

Berihsan dalam Semuanya

Daripada Abu Ya'la, Syaddad bin Aus RA berkata bahawa Rasulullah SAW bersabda:

إِنَّ اللَّهَ كَتَبَ الْإِحْسَانَ عَلَى كُلِّ شَيْءٍ، فَإِذَا قَتَلْتُمْ فَأَحْسِنُوا الْقِتْلَةَ، وَإِذَا ذَبَحْتُمْ فَأَحْسِنُوا الذَّبْحَةَ، وَلِيُحَدِّدَ أَحَدُكُمْ شَفْرَتَهُ وَلِيُرِخَ ذَبِيحَتَهُ

Maksudnya: “*Sesungguhnya Allah mewajibkan ihsan terhadap segala sesuatu. Jika kamu membunuh, laksanakanlah dengan cara yang baik, dan apabila kamu menyembelih, sembelihlah dengan cara yang baik dan hendaklah seseorang daripada kamu menajamkan pisanya serta hendaklah dia menyegerakan sembelihannya.*”

Riwayat Muslim (1955)

Pedoman dan Iktibar Hadis

Antaranya:

1. Kewajipan berihsan merupakan amalan yang disyariatkan. Ia merupakan tuntutan ketika melaksanakan segala yang fardu, meninggalkan yang haram, bermuamalat dengan makhluk dan berihsan dengan secara sempurnanya, menjaga segala adab-adab dan apabila dilakukan nescaya diterima amalnya dan banyak pahalanya.
2. Hadis ini merupakan salah satu daripada prinsip penting agama Islam. Ia mengandungi perintah supaya seluruh ajaran Islam dilaksanakan dengan penuh teliti. Ini kerana, ihsan lahir ketika melakukan sesuatu perbuatan dan perlaksanaannya yang selari dengan tuntutan syarak.

3. Perbuatan pula mempunyai kaitan sama ada dengan kehidupan manusia dan polisinya terhadap keluarga, saudara mara serta orang lain atau mempunyai kaitan dengan tempat rujukannya iaitu iman yang merupakan amalan hati dan Islam yang merupakan amalan anggota.
4. Barang siapa yang melakukan ihsan dalam kehidupan dan tempat rujukannya, maka dia mendapat keuntungan yang besar dan termasuk dalam golongan yang mendapat kebahagiaan di dunia dan di akhirat, insya Allah.
5. Ihsan sangat dituntut di saat mengerjakan kewajipan, meninggalkan yang haram dan berinteraksi dengan makhluk. Ihsan dalam perkara tersebut ialah dengan melaksanakannya sebaik mungkin, menjaga adab-adab agar sah dan sempurna. Apabila dilaksanakan demikian, amalan akan diterima dan menghasilkan pahala.
6. Di samping perkara-perkara yang disebutkan di atas, hadis ini juga merupakan salah satu daripada prinsip penting dalam Islam kerana ia merupakan seruan kemuliaan daripada Nabi SAW supaya berihsan dalam setiap amalan.
7. Hadis ini sebenarnya merupakan salah satu daripada kaedah Islam yang sangat penting kerana ia menyeru ke arah kemuliaan sebagaimana Nabi SAW perintahkan supaya berihsan dalam setiap amalan. Cukuplah dibuktikan hal ini dalam banyak tindakan Rasulullah SAW sama ada perkara kecil atau besar.

Mutiara Hikmah

- ❖ **Pujangga berkata:** Renungkanlah tentang rahmat Yang Maha Penyayang itu. Zat Penyayang itu mengampuni pelacur yang hanya memberi minum seekor anjing, memaafkan orang yang telah membunuh seratus orang, merenggangkan tangannya untuk menerima orang-orang yang bertaubat dan menyeru orang-orang Nasrani untuk bertaubat.
- ❖ **Pujangga berkata:** Lihatlah musibah itu dari sisi yang paling memberikan harapan, bayangkan pahala yang anda dapatkan dari musibah tersebut. Sedarilah bahawa musibah yang menimpa diri anda itu lebih ringan jika dibandingkan dengan menimpa orang lain. Dan, belajarlh dari orang-orang yang telah mendapat cubaan dan ujian.

Kisah Teladan

Salah seorang yang soleh menjumpai salah seorang penguasa yang zalim, maka penguasa itu pun berkata: *Demi Allah, aku akan membunuhmu dengan cara yang belum pernah aku membunuh seseorang pun dengannya.*

Maka hamba Allah yang soleh itu berkata: *“Sekiranya kamu mempunyai ramai perajurit, kamu mempunyai rumah-rumah yang indah, kamu mempunyai berbagai jenis pedang dan kamu juga mempunyai tombak, sementara aku mempunyai anak-anak panah di malam hari.”* Si pegganas yang zalim itu bertanya: *“Apakah anak-anak panah di malam hari?”* Lelaki soleh itu menjawab: *“Iaitu tali-tali busur yang aku panjangkan dengan penuh kekhusyukan, lalu aku kirimkannya dengan air mata tanpa tidur di malam hari, lalu dia pun diangkat oleh Yang Maha Hidup lagi Maha Mengatur semua urusan makhluk-Nya dan Dia berkata: Demi keagungan dan kemuliaan-Ku, sesungguhnya Aku benar-benar akan menolongmu, meskipun setelah beberapa waktu lamanya.”*

Dengan penuh gementar, si penguasa yang zalim itu berkata: *“Selama kamu berlindung kepada yang Maha Hidup lagi Maha Mengatur semua urusan hamba-Nya, maka aku tidak akan berani menyentuhmu.”*